

Eraikuntza prozesuan protagonismoa eta partaidetza exijitu dute herri mugimenduek

Euskal Herriak bizi duen prozesuan «eduki sozialak bermatu beharra» dagoela azaldu dute

I. Petxarroman / Donostia

Herria Mugi! ekimenak deituta, herri mugimenduetako ordezkari ugari bildu ziren asteburuan Zarautzen. Ekimenak oso balorazio baikorra

egin du, bai izandako partaidetzari buruz, bai han egin diren ekarpenei buruz, «garrantzitsuak» izan direlakoan. Zarautzen bildutakoek gizarte eredu alternatiboaren aldeko dinamika indartzea deliberatu dute, eta,

horretarako, Euskal Herrian egiten ari den prozesuan herri mugimenduen protagonismoa eta partaidetza exijitu dute. Halaber, herri mugimendua indartzeko zazpi lan lerro jarri dituzte abian.

IXIAR ERASUN Herria Mugi! ekimeneko ordezkariak oso balorazio baikorra egin zuen Zarautzen asteburuan egin den herri mugimenduaren bigarren topagunearen inguruan. Haren hitzetan, aldeaz aurretik zituzten helburuak uste baino hobeto gauzatu dira. Azaldu zuenez, herri mugimenduetako partaide ugari parte hartu zuen. Halaber, jorratu zituzten gai nagusietan partaidetza eta ekarpenak oso onak izan ziren: «Partaidetza eta ekarpenak oso aberasgarriak eta garrantzitsuak izan dira, eta aurrera jotzeko nahia agertu da, denok hitzartutako lan ildo batzuen inguruan».

Erasunek esan zuenez, bi egunetan 120 lagunek baino gehiagok hartu dute parte Zarautzen egindako topagunean. Iaz egindako topagunean ez bezala, aurrean Ipar Euskal Herriko herri mugimenduetako ordezkariak ere parte hartu dutela nabarmendu zuen.

Parte hartu zuten honako sektoreek: giza eta herrien eskubideen aldeko taldeak, ekologistak, gazte mugimenduak, komunikazioaren alorrekoak, euskalgintzako ordezkariak, emakumeen mugimendukoak, aisialdi eta hezkuntzaren alorrekoak, droga-menpekotasunaren ingurukoak, antimilitaristak, kulturgintzakoak, nekaza-



Herria Mugi! ekimenak asteburuan egindako batzarra.

riak, desarrollismoaren aurkakakoak, presoen aldekoak, internazionalistak, sexu askatasunaren aldekoak...

Taldeetan antolatutako dauden pertsonak ez ezik, maila pertsonalean ere hainbat pertsonak parte hartu zuten Zarautzen asteburuan egindako topaketetan.

Lan ildo nagusiak

Mikel Aznar Herria Mugi!

Ekimeneko kideak ere oso ontzat jo du asteburuko topaketa, besteak beste, elkar ezagutza, hausnarketa eta elkarlanerako gune horrek utzi dituen ondorioak «oso garrantzitsuak» direlako, bere ustez.

Aznarren esanetan, Zarautzen bildutakoek gizarte eredu alternatiboaren aldeko dinamika indartzea erabaki dute. Horretarako, zazpi lan talde osatu dituzte, beste

horrenbeste lan ildoen inguruan. Diagnostika arduratuko den lan taldea, herri mugimenduen azterketa egingo duena, komunikazioaren lan taldea, partaidetza sustatzeko lan taldea, hezkuntzaz arduratuko dena, finantza-ketaz arduratuko dena, eta desobedientziaren inguruan lan egingo duena.

Herri mugimenduek iaz egin zuten lehen topagunea, Egian.

Lan lerroak

Herri mugimendua indartzeko lan ildoak

Joan den asteburuan Zarautzen bildutakoek zazpi lan ildo hitzartu zituzten etorkizunean herri mugimendua indartzeko. Haiek garatzeko lan batzordeak sortu dituzte.

Diagnostika • Gizartea aldatzeko errealtatea ezagutzea ezinbestekoa dela dio Herria Mugi! ekimenak, eta lan hori aurrera aterako duen batzorde bat osatzea erabaki dute.

Azterketa • Herri mugimenduek elkarren artean dituzten gai zehatzen inguruko azterketak: antolaketa eta lan moldeak, partaidetza suspertzea, mi-

litanteen soslaia egitea. Halaber, ekonomia globalizazioarako lan talde bat osatu zen Zarautzen, eta etorkizunean sarearen funtzionamendua aztertzea erabaki zuten.

Komunikazioa • Herri mugimenduen artean eta gainerako gizarte eragileekin izan beharreko komunikazioa eta harremanak aztertu, eta haiek eraginkorago bilakatzeko sortu dute lan ildo hori.

Partaidetza sustatzea • Herri mailako bilguneak suspertzeko moduak aztertuko ditu batzorde batek.

Hezkuntza • Herri mugimenduaren formazioa hobetzea bilatuko du.

Finantzaketa eta baliabideak • Herri mugimenduen ahalmenari etekin gehiago ateratzeko eta baliabideen erabilpen egokia lortzeko helburua izango du horretaz arduratuko den lan taldeak.

Desobedientzia • Desobedientziaren arduratuko den taldeak hainbat aukera landuko ditu: lan teorikoa, aurrera begirako proposamenak, arazo praktikoei aurre egiteko bitarteko posibleak...

Fiskalak 20 urteko kartzela zigorra eskatu du Maria Dolores M.V.-rentzat, mutil laguna hiltzeagatik

■ Akusatuak bi urtean izan zuen hildakoaren gorpua hozkailuan sartuta

Efe / Donostia

GIPUZKOAKO Probintzi Entzutegian Maria Dolores M.V.-ren aurka egin den epaiketaren bukaeran, fiskalak 20 urteko kartzela zigorraren eskaerari eutsi dio, bere hitzetan frogatuta geratu baita emakumeak hil zuela mutil-laguna, eta hozkailuan gorde zuela haren gorpua bi urtean.

Gipuzkoako Probintzia Entzutegiko Hirugarren Sekzioan egin da epaiketa, eta ez Ministerio Fiskalak eta ezta akusazio partikularrak ere ez dute aintzat hartu emakumeak egin zuen deklarazioa. Dolores M.V.-k herenegun esan zuenez, krimena ez zuen berak egin, berak lan egin zuen klub bateko jabeak baizik. Gizon harekin emakumeak amodiozko harreman bat izan zuela aitortu zuen.

Tiroa buruan, eta labankada bularrean

Emakumeak salatu zuen gizonezkoa atxilotu zuen Poliziak hilketaren ondoren, baina gero aske geratu zen. Fiskalak uste du akusatuak egin zituen lehen deklarazioek indartzen dituela bere tesiak, alegia, Dolores M.V.k hil zuela gizona buruan tiroa egin, eta gero bularrean labankada eman ondoren.

Akusatuen arabera, «ezinezkoa» izango litzateke bestela akusatuak berriki hildako ahizparekin batera lehen deklarazio bat inprobisatu izana. Deklarazio hartan detaile ugari eman zituzten Jose Antonio Valdes Etxeberria 41 urteko gizonezkoaren heriotzaren inguruan, autopsiaren berri jakin aurretik.

Fiskaltzak dioenez, kasu horretan, gainera, bi astungarri daude: emakume eta hildako gizonaren arteko senidetza, eta azpikeria. Izan ere, fiskalak dioenez, emakumeak gizona hil zuen lotan zegoela, eta defenditzeko batere aukerarik ez zuela.